

BUKA-KAELO YA DITHAPELO

ya Paka ya Seriti sa Botho



SEASON OF
**HUMAN
DIGNITY**

ubuntu • waardigheid • botho



Copyright © 2015 Biblecor

Biblecor ke lefapha-potlana la Bible-Media

Private Bag X5, Wellington 7654

Go tsenya diotara: 0860 26 33 42

www.biblemedia.org.za



Christian Literature Fund

Private Bag X19, Wellington 76543

021 873 6964

www.clf.co.za

Ditshwanelo tsotlhe di sekeegilwe.

Ga go na karolo epe ya buka eno e e ka tthagisiwang boša kgotsa ya phasaladiwa ka mokgwa kgotsa ka tsela epe e nngwe, ka khomphiutha kgotsa ka motšhini ope, go akaretsa le go dira fothokhophi ya yone, go e rekota kgotsa ka go boloka tshedimosetso epe le ka go e tsaya gape mo e bolokilweng gone kwantle ga gore mogatisi wa yne a ntshe tetla pele ka lekwalo.

Ntle le fa go supilwe ka tsela e nngwe dinopolo tsa ditemana tsotlhe mo kgatisong eno ke tsa Baebele e e Boitshepo. © 1908, 1992 Bible Society of South Africa. E dirisiwa ka tetla. Ditshwanelo tsotlhe di sekeegilwe.

Ka tetla.

E kgabisitswe le go rulaganngwa ke Natascha Olivier
ka 10 pt mo 13.5 pt Adobe Caslon Pro

E gatisitswe le go rokaganngwa ke Paarl Litho
Rhebok Close, Wellington Industrial Park, Wellington 7655

Tikololo ya ntlha, kgatiso ya ntlha 2015

ISBN: 978 0 86487 794 9



Diteng

Tsela ya go dirisa buka eno	4
Tlotlo	6
Matseno le paakanyo	6
Dithapelo tsa ...	
1. Kamogelo	6
2. Kabelano	9
3. Go aba le boineelo	11
Go Reetsa	13
Matseno le paakanyo	13
Dithapelo tsa ...	
1. Kamogelo	13
2. Kabelano	16
3. Go aba le boineelo	20
Go tlamparelana	21
Matseno le paakanyo	21
Dithapelo tsa ...	
1. Kamogelo	21
2. Kabelano	23
3. Go aba le boineelo	24
Go ikentsha setlhabelo – lerato	26
Matseno le paakanyo	26
Dithapelo tsa ...	
1. Kamogelo	26
2. Kabelano	28
3. Go aba le boineelo	30



Tsela ya go dirisa buka eno


O a amogelwa go Paka ya Seriti sa Botho! Boikaelelo jwa Paka eno ga se sepe fela fa e se go ntšhwafatsa Aforika Borwa ka maatla a a fodisang a Modimo le go tsoolosa seriti sa botlhe.

E re ka eno e le tiro ya Modimo, re tshwanetse go e simolola ka thapelo. Modimo ke ene fela yo o ka kgonang go fitlhelela dipelo tsa batho le go tliša phetogo e kgolo mo go tsone. Re tshwanetse go lelela kwa Modimong gore a dire jalo.

Bukana eno e diretsewe go thusa batho mme segolobogolo ditlhopha tsa balatedi ba ba ikanyegang ba ga Jesu Keresete go dira jalo. Re kwadile fano, ka boikokobetso, ditemana tsa dithapelo tsa sekeresete gore di dirisiwe fa ditlhopha tse di farologaneng mo kerekeng di kopana mmogo.

Ditemana tseno ga se tsa go kaela dikopano tsa ditlhopha tse di nnye mme di ka dirisiwa jaaka tsa go simolola dikopano tsa mefuta yotlhe tsa bodiredi, dikopano tsa diboto tsa kereke, tsa badiri ba kereke, tsa mananeo a kereke a ditogamaano le, ee, le tsa ditlhopha tse dinnye. Gape go akareditswe le ditemana tsa dikokoano tsa baša, dikokoano tsa boeteledipele mmogo le dikopano tse mo go tsone go kopaneng basadi fela kgotsa banna fela.

Mekgwa e e siameng e mene ya Paka ya Seriti sa Botho – *tlotlo, go reetsa, go tlamparelana, le go ikentsha setlhabelo (lerato)* – e bopa ditlhogo tsa ditemana tsa thapelo. Re tshitshinya gore



go dirisiwe temana e e farologaneng nako le nako fa setlhopha se se rileng se kopana mmogo mme segolobogolo di dirisiwe ka tatelano e di tlhagang ka yone mo bukaneng eno.

Fa go dirisiwa ditemana tseno ka tatelano ka nako e go kopanwang ka yone, gape re tshitshinya gore go dirisiwe dikerese tsa rona. Tshubang kerese e le nngwe fa lo dirisa temana ya thapelo e e buang ka tlotlo. Tshubang kerese ya bobedi, fa ya ntlha e setse e tshubilwe, fa lo dirisa temana ya bobedi – e e buang ka go reetsa, jalo le jalo.

Le fa ditemana tsa thapelo di diretswe gore di dirisiwe tsothe ka gangwe fela, ikutlweng lo gololesegile go ka “nopola fale le fale” fa maemo a batla jalo. Fa ditemana tse di kwadilweng fano di go gopotsa tse o di ratang thata, o letlelelwa go ka fetofetola tseno go sekae.

Ditemana tseno di diretswe go akaretsa batsayakarolo botlhe. Mo buka-kaelong eno yotlhe mokgwa o o tla latelwang ke wa gore mokwalo o o kwadilweng ka ditlhaka tse di sekameng o buiwe ke botlhe ka nako e le nngwe.

Temana nngwe le nngwe e na le dikarolo di le tharo: *kamogelo*, *kabelano* le *go aba le boineelo*. Se re se amogetseng go tswa go Modimo, re a se abelana le go se naya ba bangwe. Lo ka nna lwa batla go simolola kokoano nngwe le nngwe kgotsa kopano ka dikarolo tsa ntlha tse pedi lo bo lo feleletsa ka ya boraro.

Fred Schoeman (motseleganyi) • Andries Hoffman
Elize Morkel • Tipi Jacob Nthakhe • Cas Wepener

Tlotlo

Matseno le paakanyo

Batsayakarolo ba opela sefela se se simololang fa go ntse go dirwa paakanyo ya go tshupa dikerese di le nne tse di emelang mekgwa e e siameng e le mene ya Paka ya Seriti sa Botho. Kerese nngwe le nngwe e tshwanetse go tshubiwa ke mongwe yo o emelang kereke e sele kgotsa baagi ba ba le teng foo; bana, basadi, banna, baemedi ba mapodisi kgotsa motho ope fela yo mongwe yo o tshwereng taolo (go eletswa gore yo o tshwereng taolo e nne yo o apereng yuniformo). Fa dikopano tse nne tsa thapelo di thwarwa ka tatelano mme go na le batho ba le bangwe fela mo go tsone, go ka tshubiwa kerese e le nngwe kwa kopanong nngwe le nngwe ya thapelo go fitlha di tshubilwe tsotlhe.

Dikarolo tse di farologaneng, Go Tlhatlhanya ka Lefoko la Modimo le go buisa Dikwalo, di ka buisiwa ke moeteledipele kgotsa ke batho ba ba farologaneng fa dithapelo di ntse di buisiwa ke setlhopho sotlhe.

1. Kamogelo:

Go Tlhatlhanya ka Lefoko la Modimo

Go tlotla batho ba bangwe go bakwa ke go bo re tlotla Modimo (re “boifa Morena”) e bile go bakwa ke go bo re mo tsaya a le bothokwa, seriti se a se nayang batho botlhe ba ba bopilweng mo setshwanong sa gagwe, ba ba tlhomilweng go nna baemedi

ba gagwe, batlhanka ba gagwe ba ba busang mo lefatsheng leno (Gen 1:23-28; Pes 8). Le fa e le mang yo o hutsang motho yo o susu, a baya sekgopi fa pele ga motho yo o fougatseng kgotsa a bakela ngwana sekgopi o tla lebana le Modimo yo o boitshegang (Lef 19:1-4, 9-14; Math 18:6). Mo go Isaia 59 Modimo o ikapesa ka kgalefo le ka pusoloso mo boemong jwa ba ba sa tshwarweng sentle. Le fa go ntse jalo o iketleeditse go tla jaaka Morekolodi mo go ba ba ikwatlaelang maleo a bone (tem 20). Ka jalo seriti sa rona, tlotlo le go itlotla, mmogo le go tlotla ba bangwe, go golagana le go bo re le MO GO KERESETE yo o swetseng maleo a rona. Keresete ke bothale jwa rona, tshiamo, boitshepo le thekololo (1 Bakor 1:26-31). Ka Mowa wa gagwe o tsosolotsetsa baleofi gape mo setshwanong sa gagwe. Ga re tlhore re iteba kgotsa re leba batho ba bangwe go ya ka pono ya batho (tem 26), mme re ba leba ka matlho a kutlwelobotlhoko a Modimo. Re bona se ba leng sone ka ntlha ya ga Keresete, le se ba ka fetogang go nna sone ka ntlha ya tiro ya Mowa o o Boitshepo. Jaanong, ka ntlha ya dinonofu tse di gagamatsang tsa bogosi jwa gagwe, ba maemo a a kwa tlase le ba ba nyatsegang ba botlhokwa bogolo e bile ba tshwanelwa ke tlotlo. (1 Bakor 12:21-25). E bile gape Baebele e re rotloetsa go tlotla ba a ba tlhomang (ba na le kitso kgotsa ba sena kitso) mo maemong a bolaodi. Mme fa ba palelwa mo maemong ao, re bo re ba pega molato, jaaka re tshwanetse go dira, re tshwanetse go dira jalo ka bopelotelele le ka tlotlo (Heidelberg Catechism 104 – tshaloso ya taelo ya botlhano).

Ditemana tse go tshitshintsweng gore di buisiwe

Genesisise 1:23-28; Pesalema 8; Lefitiko 19:1-4, 9-14; Mathaio 18:6; 1 Bakorinthe 1:26-31; 12:21-25.

Thapelo ya Kamogelo

Re a go baka, wena Morena, ka ntlha ya tlotlo le seriti se o se nayang mongwe le mongwe wa rona, segolobogolo ba ba nyadiwang le go kgaphelwa kwa thoko.

Morena, re a go baka.

Re tlamparela dikgang tse di molemo tsa gore o tlhatswa maleo otlhe a rona ka Keresete le go tshololela mowa wa gago ka botlalo mo go mongwe le mongwe wa rona go re ntšhafaletsa mo setshwanong sa gago.

Morena, re a go baka.

Re go lebogela mpho ya mmele wa gago, kereke, e botlhe ba amogelwang mo go yone le go tlotlwa ka tsela e ba leng ka yone.

Morena, re a go baka.

Re go lebogela leloko lengwe le lengwe le le bontshang tlotlo eno mo kerekeg le mo lefatsheng, le go tlotla batsadi le bagodi, bana, batho ba ba humanegileng le ba ba golafetseng, batho ba ba nang le taolo, le gongwe le gongwe koo ba ba nang le taolo ba tshwarang ba bangwe ka tlotlo gone le go ba direla jaaka o ba diretse.

Morena, re a go baka.

Pina ya pako kgotsa go buisa

Pesalema 145 (segolobogolo tem 8-9, 13-14) kgotsa 146:5-10.

Go tshwara ba bangwe ka seriti kgotsa go tshwarwa ka seriti

Mo metsotswaneng e se kae ya tidimalo motho mongwe le mongwe o itumelela go nna gone ga ba bangwe, o ba tshwara ka seriti mme le ene o itumelela go tshwarwa ka seriti, e le go bontsha fela gore go botlhokwa go kokoana mmogo fa dinaong tsa Morena.

2. Kabelano

Go Tlathanya ka Lefoko la Modimo

Mo Baebeleng re fitlhela dikai di le dintsi tsa batho bao ka mabela ba neng ba bontsha go sa tlotle ba bangwe. Mo go Genesis 19:4-9 banna botlhe ba Sodoma, bannye le bagolo, ba ne ba batla go betelela moeng wa ga Lote, motswagosele. Mo go Baatlhodi 19 banna ba ba boikepo ba Gibea le bone ba ne ba batla go dira se se tshwanang ka Molefi yo o neng a nna bosigo jotlhe mo motseng wa bone. Moragonyana o ne a ba naya mogadingwana wa gagwe yo ba neng ba mmetelega le go mo sotla bosigo jotlhe go fitlha a swa. Mo go Genesis 38 Juda o ne a lala le seaka mme moragonyana a batla gore ngwetsi ya gagwe e kgobotlediwe ka maje fa e sena go ima, mme a fitlhela gore tota ke ene a neng a bakile botlhaswa jono ka go akafala ga gagwe le ngwetsi ya gagwe. Re buisa mo go Jakobe 2:1-4 gore phuthego e ne e naya bahumi ba diaparo tse dintlente manno a a

kgethegileng, mme bahumanegi ba ba apareng dikatana bone ba ne ba tshwanelwa ke go nna ba eme ka dinao kgotsa go nna fa fatshe. Bahumi bao ba ne ba sa duele badiri ba bone, ba ne ba athola le go bolaya batho ba ba senang molato. Ka go leba dikai tseno le tse dingwe tse di leng mo Dikwalong, a re itebesiseng, re lebesiseng malapa a rona, diphuthego, naga ya rona le lefatshe lotlhe. Ke kae mo lefatsheng la rona mo o bonang pontsho e e maswe-maswe ya go tlhoka tlotlo? (Seno se akaretsa go sa tlotle matshelo a batho, malapa, maina, dithoto, nako le tiro. Gape se ka akaretsa go sa tlotle tlhago.)

Thapelo ya khutsafalo

Re a hutsafala, tlhe Morena, fa go tlhoka tlotlo go gatakela seriti se o re neileng sone, fa balaodi ba sa tlotle batho ba bangwe kgotsa batho ba sa tlotle balaodi, kgotsa fa bathapi ba sa tlotle bathapiwa kgotsa bathapiwa ba sa tlotle bathapi, fa baša ba sa tlotle bagolo kgotsa bagolo ba sa tlotle baša.

Re itshwarele tlhe, re a go rapela

Re a hutsafala, tlhe Morena, fa re sa tlotle popo ya gago, matshelo a batho ba bangwe, tiro, dithoto, maina, manyalo le malapa.

Re itshwarele tlhe, re a go rapela

Re a hutsafala, tlhe Morena, fa re nna le seabe

sa go sa rute setšhaba se se ntseng jalo

Efangedi le go tshela ka yone, e leng efangedi ya lerato la gago mo go botlhe.

Re itshwarele tlhe, re a go rapela

Re a hutsafala, tlhe Morena, fa re fougaditswe ke botshelo jwa

rona jwa manobonobo le go se kgathalele bahumanegi e leng se se gatakelang seriti sa ba bangwe. *Morena, re utlwele botlhoko.*

Pina ya khutsafalo kgotsa go buisa

Pesamela 142 kgotsa 94.

Thapelo ya phodiso

Re rapelela gore o re tlietse phodiso le go tsosolosa go tlotlana mo malapeng a rona, mo nageng ya rona le mo lefatsheng. Re rapelela ikonomi e e itekanetseng le e e siameng le gore baamegi botlhe ba tlaleletse go boemo jwa yone gore ditsompelo tsotlhe tsa rona di dirisiwe ka tshomarelo go tokafatsa boleng jwa botshelo jwa botlhe.

Re rapelela gore o tsosolose tlotlo mo gare ga setšhaba sa rona mo mafelong a a latelang: _____.


(Batsayakarolo ba nna le tšhono ya go umaka mafelo a a rileng mo tikologong ya bone.) Re rapelela gore o tsosolose tlotlo mo lefatsheng le le kwa ntle ga meelwane ya rona mo mafelong a a latelang: _____.

(Batsayakarolo ba nna le tšhono ya go umaka mafelo a a rileng kwa dikarolong tse dingwe tsa lefatše.)

3. Go aba le boineelo

Go Tlhatlhanya ka Lefoko la Modimo

Mo Baebeleng gape re fitlhela dikai tsa batho ba ba neng ba tlotla ba bangwe le go sireletsa kgotsa go tsosolosa seriti sa bone, ka sekai,



tshireletsego e Boase a neng a e naya Ruthe mo go Ruthe 2:8-9; Mosamaria yo o Molemo mo go Luke 10:33-35, le fa Jesu a ne a ama le go fodisa monna yo o nang le lepero mo go Mareko 1:41.

Thapelo ya boineelo

Ao tlhe Morena, re amogetse lerato le legolo thata la gago re sa tshwanelwe ke lone.

Ka jalo, re ineela go kgaratlha letsatsi le letsatsi go bontsha ba bangwe lerato leo mo magaeng, mo diphuthegong, mo dikolong, kwa re dirang gone le kwa re tshamekang gone, kwa re etelelang pele gone le kwa re salang ba bangwe morago gone.

Masego

Batsayakarolo ba bona tšhono ya go bontshana tlotlo go ya ka dingwao tsa bone kgotsa ka go tshwarana ka diatla ba bo ba opela pina e e tshwanetseng le go amogela masego a bofelo.

Go reetsa

Matseno le paakanyo

Batsayakarolo ba opela sefela se se simololang fa go ntse go dirwa paakanyo ya go tshupa kerese ya bobedi ya tse nne di emelang mekgwa e e siameng e le mene ya paka ya seriti sa botho. Fa eno e le kokoano ya ka gangwe fela, tshuba dikerese tsotlhe tse nne.

1. Kamogelo:

Go Tlathanya ka Lefoko la Modimo

Mokgwa wa ntlha o o siameng wa tlotlo o re tlisa go mokgwa wa bobedi o o siameng wa go reetsa. Fa o tlotla mongwe o tla mo reetsa. Ga go motlhofo mo bathong ba le bantsi go reetsa, segolobogolo mo motlheng ono. Re tshwaregile thata mo dina-kong tse re tshelang mo go tsone e bile re utlwa medumo e le mentsi, mme go reetsa ka kelotlhoko le go farologanya medu-mo yotlhe le mantswe go batla bokgoni jo bo rileng kgotsa bobotlana go tlhoka maiteko a a kopanetsweng a go dira jalo. Re tshitshinya gore malebana le seriti sa botho re tshwanetse go ikaelela go reetsa mafoko a mararo ka kelotlhoko, e leng:

Temana; batho ba re kopanang le bone jaaka batho ba ba dirilweng mo setshwanong sa Modimo; le tikologo e re tshelang mo go yone. Ka kaelo ya Mowa re dumela gore ka go reetsa mantswe ano re nna gaufile go lemoga lentswe la Modimo mo lefatsheng la rona.

Ditemana tse go tshitshintsweng gore di buisiwe

Ekesodo 3; 1 Dikgosi 3:16-28; 19; Jobe 42; Pesalema 19; 29; Mathaio 25; Bafilipi 1:9; Bahebera 13.

Thapelo ya go reetsa (e fetotswe go sekae)

Mongwe o tshwanetse go etelela setlhopha pele mo thapelong eno ya go reetsa:

- Nna sentle o phuthologile mme o tswale matlho. Sisibala ...
- Repa mme o utlwe go hema ga gago: goga mowa mme o o ntshe ka iketlo (boeletsa seno makgetlonyana). A o kgona go utlwa mohemo wa gago? Tshisibalo ...
- Tlhoma mogopolo mo go wena, ka sekai, ka go tlhoma mogopolo mo go nngwe ya ditemotshi tsa gago, jaaka temotshi ya go utlwa. Tlhoma mogopolo mo go se o se utlwang. Sisibala go fitlha moetelelopele a dira kitsiso ya kgato e e latelang.
- Jaanong tlhoma mogopolo mo bathong ba o kopaneng le bone le ba o buileng le bone mo malatsing a a fetileng. Lo ne lo bua ka eng? A gongwe Modimo o bua ka bone?
- Akanya ka tikologo e o nnang mo go yone: ke ditiragalo dife tse dikgolo tse di umakiwang mo dikgannyeng mo lefatsheng lotlhe ... le mo nageng yotlhe ... mo motseng/toropong le mo baaging ba gaeno le mo phuthegong ya lona ... mo botshelong jwa lelapa la gago?

- Mongwe o buisa mekwalo e e latelang ka iketlo.
A Modimo o batla go gatelela sengwe mo pelong ya gago?
Tshisibalo ...
- Bula matlho fa mongwe a buisetsa kwa godimo mokwalo o o latelang.

Mo thapelong le ka tshisibalo – Søren Kierkegaard

(Moeteledipele kgotsa mongwe yo o tlhomilweng ke setlhopha a ka buisetsa leboko leno kwa godimo.)

Fa thapelo ya me e le ya tlhoafalo e e tseneletseng e bile e le ya mo pelong

ke ne ka se ka ka nna le mafoko a mantsi go a bua

Kgabagare ke ne ka sisibala gotlhelele.

Ke ne ka simolola go reetsa

– ka se ka ka tlhola ke bua gotlhelele.

Sa ntlha ke ne ka akanya gore go rapela go akaretsa go bua.

Mme ka ithuta gore go rapela ke go reetsa,

e seng go sisibala fela.

Go ntse jalo.

Go rapela ga go reye go itheetsa fa o bua.

Thapelo e akaretsa go sisibala,

mme go sisibala,

le go leta go fitlha Modimo a utlwiwa.

Go Buisa

(Gape, moeteledipele kgotsa mongwe yo o tlhomilweng ke setlhophha, a ka buisetsa kwa godimo.)

Pesamela 19.

2. Kabelano

(Dirisa nngwe ya dithapelo tse di latelang.)

Motseletsele wa dithapelo

Morena, Re batla go reetswa fela thata mo boemong jwa go reetsa batho ba ba re dikologileng.

Morena, re thuse.

Tshisibalo ...

Mme fa re buisa Baebele ya rona, re utlwa thata se re setseng re se itse le se re batlang go se utlwa.

Morena, re thuse.

Tshisibalo ...

Mo lefatsheng le re tshelang mo go lone, gantsi re tlelwa ke matshosetsi mo boemong jwa go tladiwa ke bogone jwa gago.

Morena, re thuse.

Tshisibalo ...

Modimo o teng mo phešwaneng e e fokang

Bua, tlhe Morena.

Tshisibalo ...

Keresete yo o neng a bapolwa o ne a nna Lefoko le le neng la nna nama.

Bua, tlhe Morena.

Tshisibalo ...

Mo gare ga mantswe a batswakwa le a batho ba ba kwa ntle mo gare ga rona, go utlwala lentswe la baengele le la Modimo ka boene.

Bua, tthe Morena.

Tshisibalo ... Amen.

Rraetsho

Rraetsho yo o kwa legodimong,

leina la gago a le itshepisiwe,

re thuse go go itse sentle,

go go senka le go senka se re se itseng ka wena

go tswa mo Dikwalong;

go nyorelwa ga gago tshiamiso, boammaaruri le

kutlwelobothoko;

bogosi jwa gago a bo tle,

re kaele jaaka kereke ya gago

go lwa ntwana e e molemo mo lefatsheng

gore re nne dijana tsa letsopa tsa letlotlo la gago;

go rata ga gago a go dirwe mo lefatsheng jaaka kwa legodimo.

Re thuse gore re se ka ra ikutlwa fela

le go gatelela go dira thato ya rona mo lefatsheng,

mme re reetse le go lemoga tiro e o re neileng yone.

Re neye gompiano sejo sa rona sa letsatsi.

Tsweetswee re neye ditlhoko tsa rona tsa nama

mme o bule matlho a rona gore re bone ditlhoko tsa

ba bangwe.

*Mme o re itshwarele melato ya rona, jaaka le rona re itshwarela
ba ba molato le rona.*

Re itshwarele go bo re sa reetse ba ba re dikologileng
mme ka dinako tse dingwe le go sa ba bone.

*O se ka wa re isa mo thaelong, mme o re golole
mo go yo o bosula,*

Morena, re nonotshe ka Mowa wa gago,
gore rona, jaaka ba ba dirilweng mo setshwanong sa rona,
re lwantshane le thaelo ya go sa tlotle batho;
gonne bogosi ke jwa gago le thata le kgalalelo ka bosenabokhutlo.

Re rapela seno ka Leina la gago, Modimo-Tharonngwe
yo batho BOTLHE ba bopilweng mo setshwanong sa one.
Amen.

Thapelo e e dirwang ka kgololesego

Moeteledipele o naya botlhe tšhono ya thapelo e e dirwang ka
kgololesego. Batsayakarolo ba ka nna ba rapelela ka mo go
kgethegileng bao mantswe a bone a sa utlwiweng ka gonne ba:

- sa akarediwe
- ba humanegile
- ba sena maatla
- ba tshela ka bogole
- ba le bannye
- ba tsofetse
- ba na le sekgobo
- ba sa sireletsega
- e le batswa-ntle
- e le ba ba tlhokang tlhokomelo.

Thapelo ya kabo

(Moeteledipele kgotsa mongwe yo o tlhomilweng ke setlhopha a ka buisa thapelo e e latelang kgotsa setlhopha sotlhe se ka rapela mmogo.)

Thapelo ya ga St Francis of Assisi

Morena, ntira sedirisiwa sa kagiso ya gago.

Fa go nang le letlhoo gone, mma ke jale lerato;

Fa go nang le kgobalo gone, tshwarelo;

Fa go nang le kgaogano gone, kutlwano;

Fa go nang le phoso gone, boammaaruri;

Fa go nang le pelaelo gone, tumelo;

Fa go nang le boithobogo gone, tsholofelo;

Fa go leng lefifi gone, lesedi;

Mme fa go nang le khutsafalo gone, boitumelo.

Ao tlhe Mogodimo-dimo, ntira gore ke se batle

go tshedisiwa mme nna ke tshedise ba bangwe;

Ke se ka ka batla go tlhalogannngwa mme ke tlhaloganye
ba bangwe;

Ke se ka ka batla go ratwa mme ke rate ba bangwe.

Gonne re a amogela fa re naya ba bangwe;

Re a itshwarelwa fa re tshwarela ba bangwe;

E bile re tsalelwa botshelo jo bo sa khutleng fa re swa. Amen.

3. Go aba le boineelo

Thomo

Fa re tswa fano, re tseno mo temeng ya botshelo ...

Re tswela kwa lefatsheng: re reetsa bao matswe a bone a sa utlwiweng e bile a le bokoa.

Re tsamaya ka tlhomamisetso ya tshogofatso ya Modimo.

Tswela kwa lefatsheng: reetsa kutlobotlhoko ya lefatshe le le tlhokang.

Re tsamaya ka tlhomamisetso ya tshwaro ya Modimo.

Tswela kwa lefatsheng: lemoga se Mowa wa Modimo o re rutang le go re gakolola sone.

Re ya ka tlhomamisetso ya lerato la Modimo.

Tsamaya ga jaanong; gakologelwa gore o mang le gore o wa ga mang.

Go tlamparelana

Matseno le paakanyo

Batsayakarolo ba opela sefela se se simololang fa go ntse go dirwa paakanyo ya go tshupa kerese ya boraro ya tse nne tse di emelang mekgwa e e siameng e le mene ya paka ya seriti sa botho. Fa eno e le kokoano ya ka gangwe fela, tshuba dikereso tsotlhe tse nne. (Se tshube dikereso pele – di tla tshubiwa moragonyana.)

1. Kamogelo:

Go Tlathanya ka Lefoko la Modimo

Fa re tlotlana, re a reetsana. Fa re reetsana re utlwa ditlhoko tsa ba bangwe le matshwenyego a bone mme re tlogela go nna le maiktulo a a sa siamang ka bone. Go tswa foo re tla tlamparelana. Go tlamparelana go bontsha go amogela motho a le ka tsela e a leng ka yone. Rraagwe morwa sesenyi o ne a tlamparela morwawe yo o neng a dule mo tseleng fa a sena go boa (Luke 15). Go sa kgathalasege sotlhe se se diregileng, rre o ne a amogela morwawe ka pelo yotlhe a sa sadisa sepe kwa morago. Modimo o re amogela jalo le rona. Le rona re tshwanetse go amogela ba bangwe jalo, segolobogolo ba re akanyang gore ga ba bontshiwe kamogelo eo ka botlalo.

Ditemana tse go tshitshintsweng gore di buisiwe

Bagalatia 3:28; 1 Johane 3:17; Luke 6:36; Jakobe 3:9-10; Johane 15:17; Mathaio 19:13-15; Mareko 2:16; Johane 4:4-42; Luke 15.

Thapelo ya Kamogelo

Moetlo

Mongwe o tshuba kerese ya boraro a ntse a re:

Jesu o rile: Ke nna lesedi la lefatshe. Yo o ntsbalang morago ga a kitla a tsamaya mo lefifing, mme o tla nna le lesedi la botshelo.

Thapelo

Morena, re itemogela kamogelo le lerato la gago fa re tla fa pele ga gago,

Modimo wa kutlwelobotlhoko, re a go baka le go go leboga,

Morena, re utlwa bothitho jwa tlamparelo ya gago,

Modimo wa kutlwelobotlhoko, re a go baka le go go leboga,

Morena, re ikaegile ka wena jaaka motswedi

wa botsogo jo bo siameng jwa rona le seriti,

Motlhodi wa tsoitlhe, re a go baka le go go leboga.

Pina ya pako (Boitlhophelo)

Go Buisa

(Moeteledipele kgotsa mongwe yo o tlhomilweng ke setlhopha a ka buisa pesalema kgotsa setlhopha sotlhe se ka e buisa mmogo.)

Pesamela 133.

2. Kabelano

Thapelo ya boipobolo

(Botlhe ba rapela mmogo.)

Modimo yo o kutlwelobotlhoko, o a re rata, mme rona ga re a go rata.

O ne wa bitsa mme ra se ka ra reetsa.

Re tsamaela kgakala le baagelani ba ba tlhokang.

Re gana batho ba o ba tlamparelang.

Re amegile fela ka matshwenyego a rona. Re itshwarele tlhe, re a go rapela, ka Jesu Keresete Morena wa rona.

(Tshono ya thapelo ya boipobolo e e rapelelwang mo pelong.)

Reetsa dikgang tse di monate: Keresete o ne a re swela re santse re le baleofi. Seno se supa lerato la Modimo mo go rona.

O itshwaretswe

ka leina la ga Keresete.

O itshwaretswe ka leina la ga Keresete. A kgalalelo e ye go Modimo.

Amen.

Thapelo ya batho

Modimo wa bosakhutleng, o re romeletse Mmoloki, Keresete Jesu, go tla go thubaganya dipota tsa bobaba tse di re kgaoganyang. Tlosa letlhoo le maikutlo a a sa siamang mo go rona le mo bathong botlhe, gore bana ba rona ba letlane le ba ba nang le poifo, kilo, kgotsa tshosetso, mme re tshele mmogo ka kagiso ya gago, ka Keresete Jesu Morena wa rona.

Utlwa dithapelo tsa rona, tlhe Morena.

A re rapeleleng baba ba rona ...

(Tshono ya dithapelo tse di khutshwane ka maloko a sethlopha kgotsa thapelo e e rapelelwang mo pelong.)

Utlwa dithapelo tsa rona, tlhe Morena.

A re rapeleleng kagiso le tetlanyo ...

Utlwa dithapelo tsa rona, tlhe Morena.

A re rapeleleng go tthatlhamololwa ga dipota tsa bopelotshetlha, maatla le lefufa le le re kgaoganyang ...

Utlwa dithapelo tsa rona, tlhe Morena.

A re rapeleleng lerato, kagiso le boitumelo le sengwe le sengwe se se re kopanyang ...

Utlwa dithapelo tsa rona, tthe Morena.

A re rapeleleng ba ba kgaphetsweng kwa thoko le go tlhokomologiwa ...

Utlwa dithapelo tsa rona, tthe Morena.

3. Go aba le boineelo Go Tlathanya ka Lefoko la Modimo

Maloko a setlhopha a ema ka dinao, a a tlamparelana a bo a re: “*E kete Modimo a ka go tlamparela ka kutlwelebotlhoko eno le tshwaro.*” Morago ga seno, setlhopha se ema se dirile mosako, se tshwarane se tlamparelane, fa moeteledipele a eteletse setlhopha seno ka thapelo:

Morena, wena yo o re tlhodileng mo tshwanong ya gago, wena yo o re dirileng ba ba kwa tlasenyana ga dibopiwa tsa legodimo le go re rwesa tlotlo;

wena yo o re neileng taolo godimo ga ditiro tsa diatla tsa gago; wena yo o beileng dilo tsotlhe ka fa tlase ga dinao tsa rona; re neye botlhale le temogo go tlosa dikgoreletsi tse di kgaoganyang batho mme o tlise tshiamiso kutlwano le kagiso mo lefatsheng la gago.

Modimo wa Bosakhutleng, mmusi wa dilo tsotlhe kwa legodimong le mo lefatsheng,

amogela thapelo ya batho ba gago, mme o re nonotshe go dira thato ya gago; ka Jesu Keresete. Amen.

Fa setlhopha seo se ikaelela go simolola kopano ya sone e e latelang ka temana ya lerato la go ikentsha setlhabelo, maloko a sone a kopiwa go tla ka dimpho tse di nnye jaaka dimonamone, ditšhokolete kgotsa sepe fela se sennye thata se ba tla se abelanang le ba bangwe jaaka sesupo sa lerato le go ikentsha setlhabelo.

Go ikentsha setlhabelo – lerato

Matseno le paakanyo

Batsayakarolo ba opela sefela se se simololang fa go ntse go dirwa paakanyo ya go tshupa kerese ya bone e e emelang mkgwa ono o o siameng wa paka ya seriti sa botho.

1. Kamogelo:

Go Tlathanya ka Lefoko la Modimo

Go lebeга mkgwa wa bone o o siameng wa lerato le go ikentsha setlhabelo o fokotsegile fela thata mo gare ga baagi ba le bantsi mo lefatsheng lotlhe. Tota le mo Aforika Borwa, mo gare ga baagi ba le bantsi go tletse kgalefo, tiriso-dikgoka le letlhoo moo motho o salang o ipotsa gore botho bo ile kae mmogo le lerato le go ikentsha setlhabelo. Mo bukeng ya

Baroma 13:8 re gakololwa ka botlhokwa jo bogolo jwa lerato le go ikentsha setlhabelo, jo Baebele e bo bitsang molato o batho ba o kolotanang le go o kolota Modimo. Fano Paulo a re, “A go se nne le molato ope o o sa duelwang.” Fela jaaka go ntse ka mokgwa ope fela wa go dirisa madi ka tshwanelo, molato o tshwanetse go duelwa go tila mathata. Ka jalo molato o Bakeresete ba o kolotanang le o ba o kolotang Modimo o tshwanetse go duelwa gore go se ka ga nna le mathata fa gare ga batho ka bobone le fa gare ga batho le Modimo. Fa go sena lerato fa gare ga batho, go sena lerato fa gare ga batho le Modimo, go nna le molato wa lerato le go ikentsha setlhabelo. Ono ke molato o rotlhe re kopiwang go o duela gore go nne le kamano e e siameng mo gare ga rona rotlhe mo baaging. Fa molato oo o duetswe, go tla rena tshiamiso, tetlano, kutlwano, lerato le kagiso fa gare ga batho le Modimo.


Ditemana tse go tshitshintsweng gore di buisiwe

Lefitiko 19:18; Dipalo 14:18; Duteronomie 6:5; Mathaio 5:43; 25; Johane 13:34; Barom a 8:35; 1 Bakorintha 13:1; Bafilipi 2:1; 1 Johane 2:9.

Thapelo ya Kamogelo

Morena, re a go leboga le go go baka ka ntlha ya Modimo yo o leng ene le se o re direlang sone. Re a go leboga le go go baka ka ntlha ya tlhokomelo le masego mo botshelong jwa rona.

Modimo, tswelela ka go re segofatsa.



Morena, re go lebogela malapa a rona, batsadi ba rona,
bomogoloarona le bokgaityadiarona fano le mo
lefatsheng lotlhe.

Modimo, tswelela ka go re segofatsa.

Morena, re go lebogela badiri-ka-rona, ditsala, baagelani le
setšhaba sa rona, re go lebogela batho botlhe ba re kopanang le
bone letsatsi le letsatsi, ba re tlwaelaneng le bone kgotsa ba re
sa ba itseng.

Modimo, tswelela ka go re segofatsa.

Modimo, re go lebogela botshelo le masego otlhe a gago mme
tsweetswee, Morena, tswelela go re segofatsa. Amen.

E re ka jaanong re neile Modimo pako le ditebogo ka ntlha ya
masego ao a re nayang one, a re lebung dikereke tsa rona le
baagi ba rona mme re umakeng batho ba ba tlhokang dithapelo
tsa rona gore re ba rapelele.

(Batsayakarolo ba umaka bao ba akanyang gore ba tlhoka
dithapelo mme setlhopha se ba rapelela ka go refosana, jaaka ba
ba lwalang, ba ba senang magae, ba ba sa berekeng, le ba ba
ntshang matshelo a bone setlhabelo jaaka mapodisi, baoki,
dingaka, le barutabana.)

**Pina ya pako kgotsa go buisa (ga go
patelesege gore e dirwe)**

2. Kabelano

Thapelo ya kabelano

Modimo Mmopi, motlhodi wa botshelo le lerato, ka leina la Morwao Keresete Jesu, o re bontshitse lerato la boammaaruri le bopelotshweu, o re ratile thata jaana mo o neng wa re naya Morwao yo o tsetsweng a le esi ka bopelotshweu gore re bolokwe.

Morena, re lebogela go bo o re abetse Morwao.

Morena, re a lemoga jaanong gore ka kgato eo e o e tsereng ya lerato le bopelotshweu, o batla gore re ratane le go ikentshetsana setlhabelo ka go abelana se re nang le sone.

Morena, re lebogela go bo o re abetse Morwao.

(Motsotso wa tidimalo.)

Morena, o re neile banna le basadi, basimane le basetsana ba ba ikanyegang mo baaging ba rona, Morena, batho ba ba ikanneng gore ba tla ema le go lwela boammaaruri le boikanyegi mo gare ga bonweenwee, boferere le tshenyu. Ba dire gore ba nne lesedi le le kganyang mo lefifing; ba dire gore ba nne ditshupo tsa tsholofelo mo gare ga boitlhobogo, gore mo go bone le ka bone, re tle re itse se o se lebeletseng mo go rona.

Morena, re lebogela go bo o re abetse Morwao

3. Go aba le boineelo

Thapelo ya kabo le boineelo

Bakaulengwe le bokgaityadi, jaanong eno ke nako ya go abelana dimpho tse re tlileng ka tsone jaaka sesupo sa lerato le go

ikentsha setlhabelo se re se ithutileng mo go Keresete Jesu
Morena wa rona.¹

Fa ba ntse ba kgaogana dimpho, moabi le moamogedi ba
raana mafoko a a latelang:

MOABI: Tsaya mpho eno jaaka sesupo sa lerato le go ikentsha
setlhabelo ga me.

MOAMOGEDI: Ke a leboga e kete Modimo a ka go segofatsa.

BOTLHE: Re a go leboga, Modimo, ka ntlha ya bonnye jo re
kgonang go ba kgaogana. Jaanong fa re tlogela lefelo leno, re
thuse go abelana le ba ba tlhokang, bahumanegi, ba ba mo
tlaleng, ba ba senang magae, ba ba sa berekeng, ba ba lwalang,
ba ba jewang ke bodutu le ba matshelo a bone a leng mo
tlelelong. Re rapela ka Jesu. Amen.

BAŠA

Thapelo ya Kamogelo

Modimo wa Bosakhutleng, o re dirile mo setshwanong sa gago,
le go romela Morwao go tla go re golola.

Morena, re thuse go tlotlana le go tlotla botlhe.

Modimo wa Bosakhutleng, batho ba bantsi ba ba hutsafetseng
le ba ba kotlomaneng pelo ba tlhoka gore o ba fodise ka go ba
baya seatla.

Morena, re thuse go bula ditsebe tsa rona go utlwa selelo sa batlhoki.

Modimo wa Bosakhutleng, re kgaoganngwa ke dipota tse

1 Malebana le “go tla ka dimpho le go di abelana”, maloko a setlhopha a kopiwa go tla ka
dimpho tse di nnye jaaka dimonamone, ditšhokolete kgotsa sepe fela se sennyé thata se ba tla
se abelanang le ba bangwe jaaka sesupo sa lerato le go ikentsha setlhabelo.

dintsintsi, melete e mentsintsi, le letlhoo le le seng kana ka sepe.

Morena, re thuse go baakanya magora, go kgabaganya meletwane le go rata ba bangwe, go ba amogela le go ba tlamparela.

Modimo wa Bosakhutleng, re a ipobola gore re tshwaregile ka dilo tse re di tlhokang le tse re di batlang.


Morena, re thuse go nna le mowa wa go nna batlhanka ba boammaaruri gore re kgone go direla ka lerato le go ikentsha setlhabelo.

Thapelo ya kabelano

Etelela baša pele gore ba rapele leboko le le reng “Die kind (wat doodgeskiet is deur soldate by Nyanga)” le le kwadilweng ke Ingrid Jonker. Leboko leno le teng gape ka Seesemane mme la re ““Ngwana (yo o neng a bolawa ka go thuntshiwa ke masole kwa Nyanga)”. (Le ranotswe ke Antjie Krog le ke André P Brink.) O tla fitlhela mafoko a leboko leno (ka Seaforikanse le Seesemane) mo <https://dustymuffin.wordpress.com/2007/10/13/die-kind-ingrid-jonker/>

Dithapelo tsa kabelano ka dilo tsa botho

1. Moeteledipele o simolola karolo eno ka go buisa mafoko a pina kgotsa go e letsa, ya setlhogo se se reng “The Living Years” e e kwadilweng ke Mike le ke the Mechanics (mokwalo o o feletseng wa yone o ka bonwa mo inthaneteng).



Every generation / Blames the one before
And all of their frustrations / Come beating on your door

I know that I'm a prisoner / To all my father held so dear
I know that I'm a hostage / To all his hopes and fears
I just wish I could have told him in the living years

MOETELEDIPELE: Mo go Johane 17, Jesu o tlotla ka
kgang eno ya go tlhoka kutlwano.

Tlang, a re rapeleng mmogo:

Morena yo o Rategang, mo go Johane 17, ga o a rapelela
balatedi ba gago fela ka nako eo, mme o rapeletse le ba ba
dumelang mo go wena ka molaetsa wa bone

Gore rotlhe re nne mongwe fela.

Morena, o re tlhometse sekao: fela jaaka o le mo go Rara le
ene a le mo go wena ka Mowa wa gagwe – Rara, Morwa le
Mowa, e leng Modimo a le mongwe fela ...

Gore rotlhe re nne mongwe fela.

Morena Modimo, Jesu o dirile goe re go itse, e bile o tla
tswelela a re go itsise gore lerato le o nang le lone mo go
ene le nne mo go rona le gore Jesu ka boene a nne mo
go rona ...

Gore rotlhe re nne mongwe fela.

Mme lefatshe le tla itse gore o rometse Jesu Keresete le
gore o re ratile fela jaaka o mo ratile. Amen.

2. Kopa bana go go sala morago lo rapele leboko la “n Paternoster vir Suid-Afrika” la ga Lina Spies. O tla bona mafoko a leboko leno mo http://www.woorde.co.za/Digters/~Lina_Spies.html

Thapelo ya kabo le boineelo

Lefatshe ke la Morena, le tsothle tse di mo go lone, lefatshe, le ba ba nnang mo go lone (Pes 24:1).

Rraetsho wa Selegodimo, re ipolela gore o Morena wa popo yotlhe.

Lo amogetse fela, nayang fela (Matt 10:8b).

Morena Jesu Keresete, jaaka fa o re ineile, re tla inaya ba bangwe.

Yo o jalang ka bogoma o tla roba ka bogoma; mme yo o jalang ka bogolo o tla roba ka bogolo (2 Bakor 9:6).

Mowa o o Boitshepo, monei le montshafatsi wa botshelo, yo o kaelang le go laola matshele a rona, nna le rona mo go sotlhe se re se buang le se re se akanyang, mo go sotlhe se re se dirang, mo letsatsing leno le mo go le le tlang.

BASADI

Thapelo ya Kamogelo

Modimo wa Bosakhutleng, o re dirile mo setshwanong sa gago, le go romela Morwao go tla go re golola.

Morena, re thuse go tlotlana le go tlotla botlhe.

Modimo wa Bosakhutleng, batho ba bantsi ba ba hutsafetseng le ba ba kotlomaneng pelo ba tlhoka gore o ba fodise ka go ba baya seatla.

Morena, re thuse go bula ditsebe tsa rona go utlwa selelo sa batlhoki.

Modimo wa Bosakhutleng, re kgaoganngwa ke dipota tse dintsintsi, melete e mentsintsi, le letlhoo le le seng kana ka sepe.

Morena, re thuse go baakanya magora, go kgabaganya meletwane le go rata ba bangwe, go ba amogela le go ba tlamparela.

Modimo wa Bosakhutleng, re a ipobola gore re tshwaregile ka dilo tse re di tlhokang le tse re di batlang.

Morena, re thuse go nna le moṱa wa go nna batlhanka ba boammaaruri gore re kgone go direla ka lerato le go ikentsha setlhabelo.

Thapelo ya kabelano

(Moeteledipele o buisa thapelo ya kopo mme setlhopha se bo se naya mongwe le mongwe nako e e lekaneng ya go rapela mo pelong kgotsa go rapelela kwa godimo, mme setlhopha sotlhe se konela ka gangwe fela ka go re, “Morena, utlwa thaeplo ya rona.”)

Morena, re rapelela tsosoloso ya seriti sa basadi mo nageng ya rona ...

Morena, utlwa thapelo ya rona.

Morena, re rapelela basadi ka bontsi mo nageng ya rona ba ba tsheleng mo lehumeng.

Morena, utlwa thapelo ya rona.

Morena, re rapelela basadi botlhe ba ba senang balekane e bile ba tlhokomela bana ba bone.

Morena, utlwa thapelo ya rona.

Morena, re rapelela basadi botlhe ba ba sotlwang kgotsa ba ba tshelatang mo poifong.

Morena, utlwa thapelo ya rona.

Morena, re rapelela basadi botlhe ba ba tshelang ka HIV le ka malwetse a mangwe a a masisi.

Morena, utlwa thapelo ya rona.

Morena, re rapelela basadi botlhe ba ba thusang ka go lwela tekatekano ya bong.

Morena, utlwa thapelo ya rona.

Morena, re rapelela basadi botlhe ba ba mo maemong a boeteledipele mo pusong ya rona, mo dikerekeng, mo baaging le mo mebarakeng ya tiro.

Morena, utlwa thapelo ya rona.

Morena, re rapelela basadi botlhe ba ba tsenyang letsogo go thusa ikonomi ya rona le botshelo jwa rona jwa lelapa ka go dira ka natla ka kwa ntle ga malapa a bone le mo teng ga one.

Morena, utlwa thapelo ya rona.

(Tshono ya thapelo e e dirwang ka kgololesego.)

Morena, utlwa thapelo ya rona. Amen.

Thapelo ya kabo le boineelo

Lefatshe ke la Morena, le tsothle tse di mo go lone, lefatshe, le ba ba nnnang mo go lone (Pes 24:1).

Rraetsho wa Selegodimo, re ipolela gore o Morena wa popo yotlhe.

Lo amogetse fela, nayang fela (Matt 10:8b).

Morena Jesu Keresete, jaaka fa o re ineile, re tla inaya ba bangwe.

Yo o jalang ka bogoma o tla roba ka bogoma; mme yo o jalang ka bogolo o tla roba ka bogolo (2 Bakor 9:6).

Mowa o o Boitshepo, monei le montshafatsi wa botshelo, yo o kaelang le go laola matshelo a rona, nna le rona mo go sotlhe se re se buang le se re se akanyang, mo go sotlhe se re se dirang, mo letsatsing leno le mo go le le tlang.

BANNA

Thapelo ya Kamogelo

Modimo wa Bosakhutleng, o re dirile mo setshwanong sa gago, le go romela Morwao go tla go re golola.

Morena, re thuse go tlotlana le go tlotla botlhe.

Modimo wa Bosakhutleng, batho ba bantsi ba ba hutsafetseng le ba ba kotlomaneng pelo ba tlhoka gore o ba fodise ka go ba baya seatla.

Morena, re thuse go bula ditsebe tsa rona go utlwa selelo sa batlhoki.

Modimo wa Bosakhutleng, re kgaoganngwa ke dipota tse dintsintsi, melete e mentsintsi, le lethoo le le seng kana ka sepe.

Morena, re thuse go baakanya magora, go kgabaganya melelwane le go rata ba bangwe, go ba amogela le go ba tlamparela.

Modimo wa Bosakhutleng, re a ipobola gore re tshwaregile ka dilo tse re di tlhokang le tse re di batlang.

Morena, re thuse go nna le mowa wa go nna batlhanka ba boammaaruri gore re kgone go direla ka lerato le go ikentsha setlhabelo.

Thapelo ya kabelano

Modimo yo o Kutlwebothoko, jaaka fa banna ba kopane
mmogo fano,

re a ipobola gore gantsi re ntse re sa tshware basadi
ka tlotlo e ba nang le yone mo matlhong a gago.

Re itshwarele tlhe, re a go rapela

Re a ipobola gore gantsi ditsebe tsa rona di ntse di tswalegile
di sa utlwe selelo sa ba ba bokoa le sa batlhoki.

Re itshwarele tlhe, re a go rapela

Re a ipobola gore gantsi mabogo a rona a ntse a tlhaela
go thusa le go tlamparela.

Re itshwarele tlhe, re a go rapela

Re a ipobola gore gantsi re ntse re sa iketleeletse
go ikentsha setlhabelo sa lerato le sa go aba.

Re itshwarele tlhe, re a go rapela

(Tshono ya thapelo ya boipobolo e e rapelelwang mo pelong.)

Modimo yo o pelotshweu, ka ntlha ya letlotlo la masego a gago
a o re nayang one

letsatsi le letsatsi le ngwaga le ngwaga,

Re go naya ditebogo tsa rona.

Ka ntlha ya botshelo, lerato, botsalano, lelapa le ditsala,

Re go naya ditebogo tsa rona.

Ka ntlha ya pholo le nonofo, go bona ditlhoko tsa rona le go
diragadiwa ga dikeletso tsa rona,

Re go naya ditebogo tsa rona.

Ka dipelo tse di bontshang go tlotla ba bangwe fa re
bua le bone
Ka ditsebe tse di bulegileng go reetsa ditlhoko tsa ba bangwe
Ka diatla tse ka metlha di iketleleditseng go tlamparela
ba ba hutsafetseng le ba ba tlhokomologilweng
Ka dipelo tsa kutlwelobothoko tse di re rotloetsang go aba,
Re go obamela ka boitumelo. Amen.

Thapelo ya kabo le boineelo

Lefatshe ke la Morena, le tsothle tse di mo go lone, lefatshe, le
ba ba nnnang mo go lone (Pes 24:1).

Rraetsho wa Selegodimo, re ipolela gore o Morena wa popo yotlhe.

Lo amogetse fela, nayang fela (Matt 10:8b).

Morena Jesu Keresete, jaaka fa o re ineile, re tla inaya ba bangwe.

Yo o jalang ka bogoma o tla roba ka bogoma; mme yo o jalang
ka bogolo o tla roba ka bogolo (2 Bakor 9:6).

*Mowa o o Boitshepo, monei le montshafatsi wa botshelo, yo o kaelang
le go laola matshele a rona, nna le rona mo go sotlhe se re se buang le se
re se akanyang, mo go sotlhe se re se dirang, mo letsatsing leno le mo go
le le tlang.*

BAETELEDIPELE

Thapelo ya Kamogelo

Modimo wa Bosakhutleng, o re dirile mo setshwanong sa gago,
le go romela Morwao go tla go re golola.

Morena, re thuse go tlotlana le go tlotla botlhe.

Modimo wa Bosakhutleng, batho ba bantsi ba ba hutsafetseng
le ba ba kotlomaneng pelo ba tlhoka gore o ba fodise ka go ba
baya seatla.

Morena, re thuse go bula ditsebe tsa rona go utlwa selelo sa batlhoki.

Modimo wa Bosakhutleng, re kgaoganngwa ke dipota tse
dintsintsi, melete e mentsintsi, le lethoo le le seng kana
ka sepe.

*Morena, re thuse go baakanya magora, go kgabaganya melelwane le
go rata ba bangwe, go ba amogela le go ba tlamparela.*

Modimo wa Bosakhutleng, re a ipobola gore re tshwaregile ka
dilo tse re di tlhokang le tse re di batlang.

*Morena, re thuse go nna le mowa wa go nna batlhanka ba
boammaaruri gore re kgone go direla ka lerato le go
ikentsha setlhabelo.*

Thapelo ya kabelano

Jesu Keresete, Morena le Kgosi ya rona,
Re ineela mo go wena.

Jesu Keresete, Morena le Kgosi ya rona,
Re thuse go go latela mo go sengwe le sengwe.

Jesu Keresete, Morena le Kgosi ya rona,
*Re thuse go tlotlana le go tlotla ba bangwe –
le go nna sekai mo go ba bangwe.*

Jesu Keresete, Morena le Kgosi ya rona,
*Re thuse go reetsana le go reetsa ba bangwe –
le go thusa ba bangwe go dira se se tshwanang.*

Jesu Keresete, Morena le Kgosi ya rona,

Re thuse go tlamparelana le go tlamparela ba bangwe kwantle ga tlaolele – le go rotloetsa ba bangwe go dira se se tshwanang.

Jesu Keresete, Morena le Kgosi ya rona,

Re thuse go bontshana lerato la go ikentsha setlhabelo le go le bontsha ba bangwe – le go tlhotlheletsa ba bangwe leratong le ditirong tse di molemo.

Tshololela Mowa wa gago mo go rona,

E kete re ka ungwa maungo a lerato, boitumelo le kagiso – mo lefatsheng le le nyorilweng.

Morena, re rapelela ...

(Tshono ya thapelo e e dirwang ka kgololesego.) Amen.

Thapelo ya kabo le boineelo

Lefatshe ke la Morena, le tsoitlhe tse di mo go lone, lefatshe, le ba ba nnnang mo go lone (Pes 24:1).

Rraetsho wa Selegodimo, re a ipolela gore o Morena wa popo yotlhe.

Lo amogetse fela, nayang fela (Matt 10:8b).

Morena Jesu Keresete, jaaka fa o re ineile, re tla inaya ba bangwe.

Yo o jalang ka bogoma o tla roba ka bogoma; mme yo o jalang ka bogolo o tla roba ka bogolo (2 Bakor 9:6).

Mowa o o Boitshupo, monei le montshafatsi wa botshelo, yo o kaelang le go laola matshelo a rona, nna le rona mo go sotlhe se re se buang le se re se akanyang, mo go sotlhe se re se dirang, mo letsatsing leno le mo go le le tlang.

BUKA-KAELO YA DITHAPELO

ya Paka ya
Seriti sa Botho

Boikaelelo jwa Paka ya Seriti sa Botho ke go ntšhwafatsa Aforika Borwa ka maatla a a fodisang a Modimo le go tsosolosa seriti sa botlhe. Re ka nna le seabe mo tirong eno ya Modimo ka thapelo.

Bukana eno e diretswe go thusa batho le ditlhopha tsa balatedi ba ba ikanyegang ba ga Jesu Keresete go dira jalo – rapela. Mekgwa e e siameng e mene ya **Paka ya Seriti sa Botho** – *tlotlo, go reetsa, go tlamparela, le go ikentsha setlhabelo (lerato)* – e bopa ditlhogo tsa ditemana tsa thapelo. Temana nngwe le nngwe e na le dikarolo di le tharo: *kamogelo, kabelano le go aba le boineelo*.

Se re se amogetseng go tswa go Modimo, re a se abelana le go se naya ba bangwe.

ISBN 978-0-86487-794-9



9 780864 877949 >

